

Tupã Jejuhu.

Maiteĩ:

Ha péicha che angirũ ko'arape jahechami jeýta pe Antiguo Testaméntope Éxodo kuatione'ẽ kap. 19: 9-25-pe he'iva, ha jahecháta hína mba'eichapa jajuhukuaa Tupã Ñandejára rehe. / Mba'epa jajapóne jaikuaáramo Ñandejára outaha ñande rógape, katuete ningo jatypeipa porãta ñande rógapy ha ijerekue, ikatu haguéicha ñamopotĩmbaitéta jaguerekomimíva guive, ñandevoi jajahu porã ha ikatu haguéicha ñañemonde porãta, oguahẽvo ñahuguaitĩ ha torypápe ñamoguahẽta ha ñamboguapýta upe iporãvehápe, jaguerekóramo televisión ndajahechamo'ãi, ñamboguéta ñande selular jepeve, upe ñande Víbliã ñaguenohẽta, ñamopotĩmba porãta ha ñamohendáta ojehecha haguãme, ha heta mba'e ñañongatu porãta ojehecha'ỹ haguãicha ha'e oĩ aja pukukue ñanendive. /

Jahechamína Éxodo kap. 19: 9-25-pe he'iva... 9) Ñandejára he'i Moiséspe: Ajúta nerendápe peteĩ arai anambusúpe, Israel ñemoñare ohendu haguã añe'ẽvo ndéve. Upéicharamo hikuái ojerovia tapiáta nde rehe. Ha Moisés omombe'u Ñandejárape Israel ñemoñare he'iva. 10) Ñandejára he'i Moiséspe: Tereho ha emopotĩ chupekuéra ko'arape ha ko'ẽrõ, ha ejoheika chupekuéra ijao, 11) toñembosako'i mbohapyha árape guarã. Ha aguejýta maymáva rovake yvyty Sinaí ru'ãme. 12) Emongora upe yvyty ha ere chupekuéra ani haguã ojupi yvytýpe térã opoko upe korapy rehe. Opokóva hese tojejuka. 13) pejuka pejapívo hu'ype térã itápe. Taha'e kuimba'e térã mymba ani peheja oikove. Upe turu ipu rire ae ikatúta ojejupi upe yvytýpe. 14) Moisés oguejy rire yvytýgui, omopotĩ Israel ñemoñarekuérape, ha hikuái ojohéi ijao. 15) Ha he'i chupekuéra: Peñembosako'ike mbohapyha árape guarã ha ani oiko avave hambireko ndive. 16) mbohapyha ápe ko'ẽtĩ jave, oiko árasunu ha áratiri ha arai anambusu ojaho'ipa yvyty ru'ã. Trompéta pu mbarete oñehendu ha oñepyrũ oryrýpa joa hikuái. 17) Moisés he'i chupekuéra osẽ haguã hekohágui Tupã ruvãitĩvo. Oho opyta hikuái yvyty rembe'ype. 18) Yvyty Sinaí otimbopa, Ñandejára oguejýgui hi'ari tatáicha. Upe yvyty ojogua tatakua guasu hatatĩmbáva ha oryrýi mbarete eterei. 19) Trompéta pu hyapu mbareteve ohóvo. Moisés oñe'ẽ Tupãme ha Tupã oñe'ẽ chupe ára sunúicha. 20) Ñandejára oguejy Sinaí ru'ãme, ohenói Moiséspe ha ha'e ojupi hendápe. 21) Ñandejára he'i Moiséspe: Eguejy ha ere Israel ñemoñarépe ani haguã avave ohasa upe yvyty korágui che recha haguã, cháke heta omanóne hikuái. 22) Pa'ikuéra jepe, ikatúva oñemboja che rendápe, tekotevẽ oñemopotĩ, ýramo andyrýta hesekuéra. 23) Moisés he'i Ñandejárape: Israel ñemoñare ndojupi mo'ãi. Nde ereka kuri chupekuéra, ani avave ohasa yvyty korahágui oñemboykégui ndéve guarã. 24) Ñandejára he'i chupe: Tereho katu hendápekuéra ha eju jey Aarón ndive. Pa'i ha tetãgua ani ohasa yvyty korahágui ojupi haguã che rendápe, ýrõ andyrýta hesekuéra. 25) Moisés oguejy ha he'i ko'ã mba'e Israel ñemoñarekuérape.

(Sigue en la pág. 2)

Tupã Ñandejára ohekombo'e Moiséspe, mba'eichapa oñemopotívarã hikuái oĩ haguã Ñandejára renondépe. Ha añetehápe ningo he'i omomarangatu haguã chupekuéra, omboyke haguã chupekuéra Ñandejára mba'erãicha, ha péicha mba'e he'ise hína oipe'a haguã ijehegui iky'aha, taha'e ñande rete'ape rehegua ha avei ñande rekovepýpegua. / Péicha oñe'ẽ hína upe pekádo ñande rekovépegua rehe. Tupã Ñandejára he'i Moiséspe omongora haguã upe yvyty, upe yvyty Tupã Ñandejára oguejyha rehe avave noñembojavarãi, ha upévore oñemongora, Ñandejára ete omongorauka ani haguã avave oñemboja upe yvyty rehe ndoikuaáigui, ha péichamba'e ohechauka Ñandejára oñangarekoha ñande rehe. Ha ñanembo'e avei ñañangarekóvarãha upe imarangatúva rehe, upe Tupã tupao rehe ñañangarekóvarã, ha ñande rete Espíritu Santo rógava rehe, ko'yte ñañangarekóvarã. / Ha jahecha háicha koñande árape, ndojeguererekovéi mba'eguasúramo umi imarangatúva, tupao umíape jaha haguã ñande ao rehe nañapena guasuvéi, heta yeyve oimeháicha rei ojeho tupaópe, ha jerokyhápe guarã katu oñeñemonde porã. Ko'ágarupi ningo mba'evéma ndojeguererekovéi imarangatúvaramo. / Ko'ape jahecha Tupã Ñandejára oikuaaakaha ñandéve, oĩha hekopeguáva ha hekopegua'yva ñaime haguã henondépe, ñañemboja haguã hendápe, ndaha'ei oimeháicha rei. Ñandejára oipota tañañemarangatu, ha oipota tañanepotĩ avei. Isaía kuatiañe'ẽme ningo he'i: upe ñane'angaipa pytã tuguyramo jepe, morotĩ sakã opytátha, ha Ñandejára oikuaa mba'eichapa ñanemopotívarã ñande rekovepýguio, upe ñane'angaipa oĩháguio, ha katu jajapóvarã pe Ñandejára he'iva, ha upe Nuevo Testaméntope he'i ñandéve Ñandejára Hesukrísto ruguy ñanemopotĩha oimeháichagua angaipágui, ha péicha mba'e hína tekotevêva jajapo, jajerovia Hesukrísto rehe ha ñamoi'ipópe ñane'anga ñande rekove ha ha ha'e ñanemopotĩta oimeháichagua ñane'angaipágui, ha Hesukrísto rupive añoite ikatúta ñañemboja Tupã Ñandejára ypýpe.

Israel ñemoñare oñembosako'ivakue mbohapy ára ou haguã Ñandejára ypýpe, ha ohechávo Ñandejára ouha tatarendy ha turupu ha yvyryryi rupive oñembo'ypa henondepe tuicha py'andýi reheve, upe oĩha hikuái omimbipa. Hikuái ohendu Tupã Ñandejára oñe'ẽha Moiséspe, ha okyhyje upe mba'eguasute ojuhúva upépegui. / Upe kyhyje marangatu oñandúva hikuái añetete tekotevê eterei ñañandu ñande rekovépe ñañemboja haguã Ñandejára rendápe.

(Sigue en la pág. 3)



PROGRAMA 1.420. MBA'E PORÃ RA'ARÕVO. Pág. 3.

Tupã Ñandejára oguejy rire upe Sinai hérava yvyty ru'ãme, ohenói Moiséspe, ha Moisés ojupi hendápe oi haguã hendive upépe hovakete. Ha Ñandejárañe'ẽme oñemombe'u ñandéve, Tupã Ñandejára oñe'ẽ hague Moises ndive añoite ojavake. / Moises iñe'ẽrendu, ha ojapo Tupã Ñandejára he'iva guive chupe. Ha ohenóivo chupe ojupi haguã hendápe upe yvyty ru'ãme ha'e ojapo upéicha. Péichavarã avei ñande jaipotáramo Tupã ñande rovasa, ñaneñe'ẽrendúvarã ha jajapóvarã upe ha'e he'iva ñandéve. / Ñande jaguereko ñaína upe Ñandejárañe'ẽ upe Víblia ja'eha, ha ojeleévo terã ñande jale'evo ikatu avei ñehendu Ñandejára etépe oñe'ẽramo ñandéve, ha ikatu avei ñaneñe'ẽrendu chupe, ikatu avei jajapo upe ha'e ojeruréva ñandéve. Ha ikatu avei nañapenáí, ha nañapenáíramo ha'e he'iva rehe, ndajahupytykuaái chugui ijovasapy. //

Ha péicha hína nde che angirũ, Tupã Ñandejára ombou jey Moiséspe ohechapa haguã oikóva tetãygua apytépe, ha he'i chupe, upéi ojupi jey haguã hendápe Aaronndive, ha ambuekuéra umi pa'i ndohasávarãi upe yvyty oñembokorapyha renda, ha ko'yteve ambue tetãygua ha mba'evéichagua tymba ndohasávarãi. / Upe tenda Tupã Ñandejára oñha, upéva tenda marangatu, ha ñamomarangatúvarã, jarespetávarã ñande py'ite guive ha añetehápe, ha ñambo'evará ñande rapichakuérape omomarangatu kuaa haguã umi mba'e imarangatúva. / Ha ko'ape jahecha ñaína, Tupã Ñandejára eteha upe ombohapéva ñandéve ñañemboja kuaa haguã hendápe, ha'e ningo ñande apohare, ñande rekove jára ha eterei ñande rayhu ha oñse ñanendive. Ha Moises hemijokuái rupive oikuaauka ñandéve ñañemboja kuaa haguã hendápe, terã ha'e oñemboja haguã ñanerendápe, ñande jaguereko tekotevẽva jajapo, terã ojejapo ñande rehe, ñanepotĩvarã ñande rekovepýpe, ñane'anga ipotĩvarã ha avei ñande rete. Ñandejára Hesukrísto oúvaekue ome'ẽ hekove kurusu rehe ikatu haguãicha jajeroviáva guive hese jahupyty perdon ha salvation, ha'e hína upe huguy oñohẽvaekue rupive omopotĩ ñane'anga ha ñande rekove. Péicha jajapóramo ikatúta ñaime Ñandejára ndive ha ha'e ñanendive. Ha hi'aiténte chéve pya'emi ha voimi guive tañamoĩ ñande jerovia Hesukrísto rehe ikatu haguãicha jahupyty ha ñañemomba'e upe Tupã Ñandejára mborayhu ha ijovasapy rehe. Ha Ha'e tande rovasa.

(Final del programa 1.420)